

續唐三體詩

七言古詩
五言排律

卷四
之八

續唐三體詩目錄卷第四

江邨 高士奇 竹窻 選

七言古體詩四十四首

上官儀一首

喬知之一首

駱賓王一首

宋之問一首

李嶠一首

張說一首

沈佺期一首

王翰一首

儲光義三首

崔顥二首

王維五首

孟浩然一首

王昌齡三首

高適五首

常建一首

岑參六首

李頎七首

崔國輔一首

獨孤及一首

元結一首

續唐三體詩目錄卷第四終

續唐三體詩卷第四

江邨 高士奇 竹窓 選

七言古體詩

上官儀

儀字游韶陝州人高宗卽位儀爲相麟德元年坐梁王忠事下獄死儀工詩其詞綺錯婉媚及貴人效之號上官體儀嘗凌晨入朝巡洛水隄步月徐轡詠詩曰鵲飛山月曙蟬噪野風秋音韻清亮望之猶神仙焉 儀詩中用影娥池時無解其事祭酒令狐德棻召張柬之等十餘人示此詩柬之對曰洞冥記漢

武帝於望鶴臺西起臺曰俯月臺臺下穿影
娥池每登臺眺月影入池中使宮人乘舟笑
弄月影因名影娥池亦曰眺蟾臺德棻歎其
博識

和太尉戲贈高陽公

熏爐御史出神仙雲鞍羽蓋下芝田紅塵正起浮橋
路青樓遙敞御溝前傾城北態芳菲節絕世相嬌二
八年慣是洛濱要解珮本是河間好數錢翠釵照曜
銜雲髮玉步逶迤動羅襪石榴絞帶輕花轉桃枝綠
扇微風發無情拂袂欲留賓詎恨深潭不可越天津
一別九秋長豈若隨聞三日香南國自然勝掌上東

家復是憶王昌

喬知之

本事詩云知之武后時人官補闕有婢名窈
娘藝色爲當時第一知之寵待爲之不婚武
延嗣聞之求一見勢不可抑旣見卽留無復
還理知之憤痛成疾因爲詩寫以縑素厚賂
閹守以達窈娘得詩悲惋結於裙帶赴井而
死延嗣見詩遣酷吏誣陷知之破其家下獄
死

綠珠篇

石家金谷重新聲明珠十斛買娉婷昔日可憐君自

許此時歌舞得人情君家閨閣不曾難好將歌舞借
人看富貴雄豪非分理驕奢勢力橫相干別君去君
終不忍徒勞掩袂傷紅粉百年離別在高樓一旦紅
顏爲君盡

駱賓王

賓王義烏人七歲能賦詩武后時數上疏言
事除臨海丞怏怏不得志棄官去徐敬業亂
以爲府屬代敬業爲檄武后罪后讀但嘻笑
至一杯之土未乾六尺之孤安在矍然曰誰
爲之或以賓王對后曰宰相安得失此人敬
業敗亡命不知所之中宗時詔求其文得數

百篇 賓王七歲詠鵝云鵝鵝鵝曲項向天
歌白毛浮綠水紅掌撥青波

代女道士王靈妃贈道士李榮

元都五府風塵絕碧海三山波浪深桃實千年非易
待桑田一變已難尋別有仙居對三市金闕銀宮相
向起臺前鏡影伴仙娥樓上簫聲隨鳳史鳳樓迢遞
絕塵埃鶯時物色正徘徊靈芝紫檢參差長仙桂丹
花重疊開雙童綽約時遊陟三鳥聯翩報消息盡言
真侶出遨遊傳道風光無限極輕花委砌惹裾香殘
月窺牕幌色箇時無數併妖妍箇裏無窮總可憐
別有衆中稱黜帝天上人間少流例洛濱仙駕啓遙

源淮浦靈津符遠溼自言少小慕幽玄只言容易得
神仙佩中邀勒經時序簫裏尋思復幾年尋思許事
真情變二八容華識少選漫道燒丹止七飛空傳化
石曾三轉寄語天上弄機人寄語河邊值查客乍可
忽忽共百年誰使遙遙期七夕想知人意自相尋果
得深心共一心一心一意無窮已投漆投膠非足擬
只將羞澀當風流持此相憐保終始相憐相念倍相
親一生一代一雙人不把丹心比亙石惟將濁水況
清塵只言柱下留期信好欲將心學松薺不能京兆
畫蛾眉翻向成都騁騶引青牛紫氣度靈關尺素艷
鱗去不還連苔上砌無窮綠修竹臨壇幾處斑此時

空牀難獨守。此日別離那可久。梅花如雪柳如絲。年
去年來不自持。初言別在寒偏在。何悟春來春更思。
春時物色無端緒。雙枕孤眠誰分許。分念嬌鶯一種
啼。生憎燕子百般語。朝雲旭日照青樓。遲暉麗色滿
皇州。落花泛泛浮靈沼。垂柳長長拂御溝。御溝大道
多奇賞。俠客妖容遞來往。寶騎連花鐵作錢。香輪
駑水珠爲網。香輪寶騎競繁華。可憐今夜宿娼家。鸚鵡
杯中浮竹葉。鳳凰琴裏落梅花。許輩多情偏送款。爲
問春花幾時滿。千回鳥信說衆諸。百過鶯啼說長短。
長短衆諸判不尋。千回百過浪關心。何曾舉意西鄰
玉。未肯留情南陌金。南陌西鄰咸自保。還轡歸期須

及早爲想三春狹斜路莫辭九折卽關道假令白里
似長安須使青牛學劍端蘋風入馭來應易竹杖成
龍去不難龍驪去去無消息鸞鏡朝朝減容色君心
不記下山人妾欲空期上林翼上林三月鴻欲稀華
表千年鶴未歸不分淹留桑路待祇應直取桂輪飛

宋之問

見前

放白鷗篇

故人贈我綠綺琴兼致白鷗鳥琴是嶧山桐鳥出吳
溪中我心松石清霞裏弄此幽絃不能已我心河海
白雲垂憐此珍禽空自知著書晚下麒麟閣幼稚驕
癡候門樂乃言物性不可違白鷗愁慕刷毛衣玉徽

閉匣留爲念六翮開籠任爾飛

李嶠

新書云嶠字巨山趙州贊皇人爲兒時夢人遺雙筆自是有文詞十五通五經二十擢進士第始調安定尉舉制甲科授給事中辨狄仁傑等枉忤武后旨出爲潤州司馬久乃召爲鳳閣舍人俄知天官侍郎事進平章事張易之敗坐附會貶通州刺史數月以吏部侍郎召爲中書令加修文館大學士封趙國公睿宗立罷政事玄宗立貶滁州別駕聽隨子虔州刺史暢之官卒年七十嶠前與王勃楊

新唐書卷一百一十五
盈川接中與崔融蘇味道齊名晚諸人沒而
爲文章宿老一時學者取法焉

汾陰行

君不見昔日西京全盛時。汾陰后土親祭祠。齋宮宿
寢設廚供。撞鐘鳴鼓樹羽旗。漢家四葉才且雄。賓筵
萬靈服九戎。栢梁賦詩高宴罷。詔書法駕幸河東。河
東太守親掃除。奉迎至尊導鑾輿。五營將校列容衛。
三河縱觀空里閭。回旌駐蹕降靈場。焚香奠醑邀百
祥。金鼎發食正焜煌。靈祇煒燁攄景光。埋玉陳牲禮
神畢。舉麾上馬乘輿出。彼汾之曲嘉可遊。杏蘭爲楫
桂爲舟。棹歌微吟綵鷁浮。簫鼓哀鳴白雲秋。歡娛宴

洽賜羣后。家家復除戶。牛酒聲名動天樂。無有千秋
萬歲南山壽。自從天子向秦關。玉輦金輿不復還。珠
簾羽蓋長寂寞。鼎湖龍髯安可攀。千齡人事一朝空。
四海爲家此路窮。雄豪意氣今何在。壇場宮館盡蒿
蓬。路逢故老長歎息。世事回還不可測。昔時青樓對
歌舞。今日黃埃聚荆棘。山川滿目淚沾衣。富貴榮華
能幾時。不見只今汾水上。唯有年年秋雁飛。
幸蜀登華萼樓使樓前善水調者登而歌曰山川滿目淚沾衣富貴榮華能幾時不見只今汾水上唯有年年鴻雁飛上顧侍者曰誰爲此曰宰相李嶠辭也
上曰真才子也不待曲終而去

張

說

見前

鄴都引

君不見魏武草創爭天祿羣雄睚眦相馳逐
畫攜壯士破堅陣夜接詞人賦華屋都邑繚繞
西山陽桑榆漫漫漳河曲城郭爲墟人代改
但見西園明月在鄴傍高塚多貴臣蛾眉曼
睩共灰塵試上銅臺歌舞處唯有秋風愁殺人

沈佺期

見前

入少密谿

雲峯苔壁遶谿斜江路香風夾岸花樹密不言通鳥
道雞鳴始覺有人家人家更在深巖口澗水周流宅
前後遊魚瞥瞥雙釣童伐木丁丁一樵叟自言避喧
非避秦薜衣耕鑿帝堯人相留且待雞黍熟夕臥深

山蘿月春

王翰

翰字子羽晉陽人少豪健恃才張嘉貞張說
爲并州長史厚禮之爲駕部員外郎坐事貶
道州司馬卒

賦得明星玉女壇送廉察尉華陰

洪河之南曰秦鎮發地削成五千仞三峯離地皆倚
天惟獨中峯特修峻上有明星玉女祠祠壇高眇遠
逶迤三十六梯入河漢樵人往往見蛾眉蛾眉嬋娟
又宜笑一見樵人下靈廟仙車欲駕五雲飛香扇斜
開九華照含情遲佇惜韶年願侍君邊復中旋江妃

玉佩留爲念。羸女銀簫空。自憐仙俗途。殊兩情遽感。
君無盡辭君去。遙見明星是妾家。風飄雲散不知處。
故人家在西長安。賣藥往來投此山。綵雲蕩漾不可
見。綠蘿蒙茸烏綿蠻。欲求玉女長生法。日夜燒香應
自還。

儲光羲

見前

薔薇篇

裊裊長數尋。青青不作林。一莖獨秀當庭心。數枝分
作滿庭陰。春日遲遲欲將半。庭影離離正堪玩。枝上
嬌鶯不畏人。葉底飛蛾自相亂。秦家女兒愛芳菲。畫
眉相伴采葳蕤。高處紅鬚欲就手。低邊綠刺已牽衣。